


Ni Pangulong
Thomas S. Monson



Pagdiskubre liwat sang Espiritu sang Paskua

Madamo nga tinuig na ang nagligad bilang isa ka bataon nga elder, gintawag ako upod sang iban pa nga magkadto sa isa ka ospital sa Salt Lake City agud maghatag sang blessing sa nagamasakit nga kabataan. Sa amon pagsulod, nakita namon ang isa ka Christmas tree nga may masanag kag manami nga mga suga kag ang mahipid nga mga pinutos sa idalom sang iya sini nagabunghay nga mga sanga. Dayon naglabay kami sa mga pasilyo sa diin ang magagmay nga kabataan nga lalaki kag babayi—ang pila sini may bendahe nga semento sa butkon ukon batiis, ang iban may mga balatian nga ayhan indi madali paayuhon—nagtamyaw sa amon nga nagayuhum.

Isa ka diutay, masakiton kaayo nga bata nga lalaki ang nagtawag sa akon, “Ano’ng ngalan mo?”

Ginsugiran ko sia sang ngalan ko, kag namangkot sia, “Pwede mo ako mahatagan sang blessing?”

Ang blessing ginhataq, kag sa amon paghalin sa kilid sang iya hiligdaan, nagsiling sia, “Madamo gid nga salamat.”

Nakalakat kami sang pila pa lang ka tikang, kag dayon nabatian ko sia nga nagsiling, “Ay, Brother Monson, malipayon nga Paskua sa imo.” Dayon isa ka manami nga yuhum ang naggwa sa iya guya.

Ato nga bata may espiritu sang Paskwa. Ang espiritu sang Paskua isa nga ginalauman ko nga maangkon

naton tanan sa aton mga tagipusuon kag mga kabuhi—indi lamang sa sini nga tion kundi subong man sa bilog nga tuig.

Kon may espiritu kita sang Paskua, madumduman naton Sia nga ang Iya pagkatawo aton ginasaulog sa sini nga tion sang tuig: “Kay natawo sa inyo karon nga adlaw sa banwa ni David ang Manluluwas, nga si Cristo nga Ginuo” (Lucas 2:11).

Sa aton panahon ang espiritu sang paghatag sang mga regalo may daku nga papel sa pagsaulog sang tion sang Paskua. Ginahunahuna ko kon makabulig nga pamangkuton naton ang aton mga kaugalingon, Ano nga mga regalo ang luyag sang Ginuo nga ihatag ko sa Iya ukon sa iban sa sining importante nga tion sang tuig?

Luyag ko magsiling nga gusto sang aton Amay nga Langitnon nga ang tagsa sa aton maghatag sa Iya kag sa Iya Anak sang regalo sang pagkamatinumanon. Nabatyagan ko man nga luyag Niya magpangayo sa aton nga magbulig sa iban gamit ang aton kaugalingon nga mga ikasarang kag mga talento kag indi mangin maiya-iyahon ukon dalok ukon palaaway, pareho sang ginalaygay sang Iya pinalangga nga Anak sa Libro ni Mormon:

“Kay sa pagkamatuod, sa pagkamatuod ginasiling ko sa inyo, sia nga may espiritu sang pagbinaisay indi

sa akon, kundi iya sang yawa, kag . . . ginasugyot niya ang mga tagipusuon sang mga tawo sa pagpakigbais nga may kaakig, ang isa batok sa isa.

“Yari karon, indi amo ini ang akon doktrina, nga sug-yuton ang mga tagipusuon sang mga tawo sa kaakig, ang isa batok sa isa; kundi amo ini ang akon doktrina, nga ang subong nga mga butang pagadulaon” (3 Nefi 11:29–30).

Sa sining pinasahi nga dispensasyon sang kabug-osan sang panahon, ang aton mga oportunidad sa pagpalangga kag pag-alagad sa iban gamit ang aton kaugalingon nga mga ikasarang matuod gid nga wala sing katapusan, apang ang mga ini madali man madula kon indi pag-aktohan sa gilayon. Karon may mga tagipusuon nga dapat palipayon, malulo nga mga pulong nga dapat ihambal, mga buluhaton nga dapat himuong, kag mga kalag nga dapat luwason.

Ang isa nga may madalum nga paghangop sa espiritu sang Paskua nagsulat:

Ako ang Espiritu sang Paskua—

Nagasulod ako sa puluy-an sang kaimol, nga kabang-danan agud ang malapsi nga kabataan magdaku ang mga mata, sa tuman nga kalipay.

Ginapalugak ko ang kuom nga mga kamot sang kuriptok kag gani ginapakita ang isa ka masanag nga parte sa iya kalag.

Ginapabalik ko sa mga tigulang ang handurawan sang ila pagkalamharon kag ginapakadlaw kasubong sang sila bataon pa.

Ginabuhi ko ang kapagsik sa tagipusuon sang mga bata, kag ginapanagan ang katulugon sang manami nga mga damgo.

Ginatulod ko ang handa nga mga tiil nga magsaka sa madulom nga mga hagdanan agud magbulig sa mga nagakinahanglan, nga nagabilin sang mga tagipusuon nga nahalawhaw sa kaayo sang kalibutan.

Ginapauntat ko sing makadali ang buahaha sa iya wala'y disiplina, mausik nga pamatasan kag magpadala sing bisan diutay lang nga handumanan sa isa ka nagakabalaka nga pinalangga nga rason agud magtulo ang mga luha sang kalipay—mga luha nga nagapanas sang madalum nga mga marka sang kasubo.

Nagasulod ako sa madulom nga mga selda, nga gina-pahanumdum ang namantsahan nga pagkatawo sang kon ano kuntani ang mahimo natabo kag nagatudlo pakadto sa masanag pa nga palaabuton.

Nagasulod ako sing hinay-hinay sa malinong, masubo nga puluy-an sang kasakit, kag ang mga bibig nga tuman ka luya sa paghambal nagakurog lang sa mahipos, makatalandog nga kapasalamatian.

Sa linibo ka mga paagi, ginapatangla ko ang kapoy nga kalibutan sa nawong sang Dios, kag sa makadali malipatan ang mga butang nga indi importante kag wala'y pulos.

Ako ang Espiritu sang Paskua.¹

Kabay nga ang tagsa sa aton liwat nga madiskubrehan ang espiritu sang Paskua—ang Espiritu ni Cristo.

TANDA

1. E. C. Baird, “Christmas Spirit,” sa James S. Hewitt, ed., *Illustrations Unlimited* (1988), 81.

PAGTUDLO GIKAN SA SINING MENSAHE

Sa inyo pagpaambit sang mensahe ni Pangulong Monson sa pamilya, binag-binaga ang paggamit sang pamangkutanon nga iya ginpresenter parte sa mga regalo nga luyag sang Dios nga ihatag naton sa Iya ukon sa iban sa sini nga tion. Paisoga ang mga miyembro sang pamilya sa pagsulat sang ila mga hunahuna kag mga ideya (ukon, para sa magagmay nga kabataan, magdrowing sang isa ka larawan) parte sa kon paano “liwat nga madiskubrehan ang espiritu sang Paskua—ang Espiritu ni Cristo.”

LAMHARON

Ang Perpekto nga Bisperas sang Paskua

Ni Jerie S. Jacobs

Sang bata pa ako, isa sang pinakamanami nga parte sang tagsa ka tuig amo ang Bisperas sang Paskua. Kami sang akon pamilya nagahimo sang pizza, nagapangaroling, kag dayon nagatipon para sa isa ka Christmas devotional. Nagakanta kami sang mga himno sa apat ka tono nga daw medyo libagon kag nagatukar sing matunog sang mga daigon sa di-kinaandan nga

nagkalainlain nga mga instrumento. Si Tatay nagahinga-pos pirme sang gab-i sa [pagbilin sang] isa ka hunahuna para sa Paskua nga nagapahibi sa amon sa kalipay. Wala na sing masobra pa kanami sangsa Bisperas sang Paskua.

Sang pagdaku-dako ko na, si nanay nagsugod sa pagbantay sang isa ka bata nga kaingod namon, nga si Kelly. Si Kelly nagakadto sa amon balay adlaw-adlaw pagkatapos sang klase samtang ang iya nanay, nga si Patty, nagaobra. Si Kelly nagasunod-sunod sa akon nga daw tutoy—kagahod kag pirme lang may ginapangayo. Gakahaw-asan ako pirme kon sugaton na ni Patty ang iya bata kag bayaan ang amon puluy-an kag pamilya sa kalinong.

Isa ka Disyembre, nadismaya ako sang gin-imbitar ni nanay si Patty kag Kelly nga mag-upod sa amon sa pagsaulog sang Bisperas sang Paskua. *Ang akon Bisperas*

sang Paskua. Si nanay nagyuhum kag nagpasalig sa akon, "Wala sang may maliwat." Pero mas nakahibalo ako. Ubuson nila ang amon pizza. Kadlawan ni Kelly ang amon panganta. Ginbaton ko nalang nga amo ini ang mangin pinakalaw-ay nga Bisperas sang Paskua sa tanan.

Pagkagab-i, si Patty kag Kelly nag-entra sa amon, kag nag-inistorya kami kag nagkinadlaw kag nagkinnanta. Husto si nanay. *Nangin* manami ini kaayo. Pag-abot sang tungang-gab-i ginpasalamatnila kami kag naglakat nga daw wala gana magpauli. Nagtulog ako nga puno ang tagipusuon sang gugma kag kapasalamat. Nadiskubrehan ko nga ang pinakamanami nga mga regalo sang Paskua indi mabuhinan kon ginapambit. Sa baylo, mas naganami kag nagadamo ini kon aton ginapanghatag.



Visiting Teaching, isa ka Buluhaton sang Kaluwasan

Tun-i ining materyal sing mainampuon kag, kon nagakabagay, hambali ini upod sang mga sisters nga inyo ginabisita. Gamita ang mga pamangkot agud buligan kamo sa pagpabakod sang inyo mga sisters kag himuong ang Relief Society nga aktibo nga babin sang inyo mismo kabuhi.

Ang visiting teaching nagahatag sa mga babayi sang oportunidad sa pagbantay, pagpabakod, kag pagtudlo sa isa kag isa—ini matuod gid nga isa ka buluhaton sang kaluwasan. Paagi sa visiting teaching, ang mga sister nagaalagad bilang mga tiglawas sang Manluluwas kag nagabulig sa paghanda sang mga babayi para sa mga bugay sang kabuhi nga wala'y katupusan.

“Dapat kita ‘magpaandam, magpaathag, magpaisog, kag magtudlo, kag mag-agda [sang iban] nga magkari kay Cristo’ (D&C 20:59), subong sang ginsiling sang Ginuo sa iya diosnon nga mga pahayag,” hambal ni Pangulong Spencer W. Kimball (1895–1985). Dugang pa, sia nagsiling, “Ang inyo panaksihon manami nga pamaagi sa pagpahayag sing mensahe.”¹

Kon kita bilang mga visiting teachers magdugang sang aton ihibalo sa mga kamatuoran sang ebanghelyo, ang aton mga panaksihon magapabakod kag magasuporta sang mga sisters nga nagahanda nga mabunyagan kag makumpirmahan. Ginabuligan nato ang bag-o nga mga miyembro nga mangin lubos ang dedikasyon sa ebanghelyo. Ang aton mga pagbisita kag pagpalangga nagabulig

“pabalik sinang mga nagtalang [kag] nagapainit sang mga tagipusuon sinang mga naglas-ay sa ebanghelyo.”² Kag ginapaisog nato ang mga sisters nga magkari kay Cristo paagi sa pagsulod sa templo.

“Magaluwas kamo sang mga klag,” siling ni Pangulong Kimball sa mga visiting teachers, “kag sin-o ang makasiling kundi nga ang madamo sang mga maayo, aktibo nga mga tawo sa Simbahan karon mga aktibo bangud nagkadto kamo sa ila mga puluy-an kag naghatag sa ila sang bag-o nga panglantaw [sa kabuhil], isa ka bag-o nga panawan. Ginpakita ninyo sa ila ang mga butang nga wala pa nila mahangpan. Ginpalapad ninyo ang ila pananawan. . . .”

“Nakahibalo bala kamo, indi lamang ining mga sisters ang inyo ginaluwas, kundi ayhan ang ila man mga bana kag ila mga panimalay.”³

Gikan sa Balaan nga mga Kasulatan

Doctrine and Covenants 20:59;
84:106; 138:56

Gikan sa Aton Kasaysayan

Sang ang Propetang si Joseph Smith nagpasad sang Relief Society,

nagsiling sia nga ang mga babayi indi lang kay mag-atipan sang mga imol kundi magluwas man sang mga kalag. Nagtudlo man sia nga ang mga babayi sa Simbahan may importante kaayo nga papel sa plano sang kaluwasan sang Amay nga Langitnon.⁴ Tungod ginagihahan kita sang mga prinsipyo nga gintudlo sang Propetang si Joseph Smith, kita bilang mga sisters sa Relief Society sarang magbinuligay agud ihanda ang mga kababayin-an kag ila mga pamilya para sa pinakadaku nga mga bugay sang Dios.

“Mangin maluluy-on kita sa isa kag isa,” siling ni Pangulong Brigham Young (1801–77), “kag tugoti [inang mga] mabaskog nga magbatiti sing mahinalungan sang mga maluya tubtob magbakod, kag tugoti inang mga makakita nga maggiya sa mga bulag tubtob nga sila mismo makakita na sang alagyan.”⁵

MGA TANDA

1. Spencer W. Kimball, sa *Daughters in My Kingdom: The History and Work of Relief Society* (2011), 116.
2. Eliza R. Snow, sa *Daughters in My Kingdom*, 83.
3. Spencer W. Kimball, sa *Daughters in My Kingdom*, 117.
4. Tan-awa sa Joseph Smith, sa *Daughters in My Kingdom*, 171–72.
5. Brigham Young, sa *Daughters in My Kingdom*, 107.

***Ano ang Sarang Ko
Mahimo?***

- 1.** Paano ang Relief Society nagahanda sa akon para sa mga bugay sang kabuhi nga wala'y katapusan?
- 2.** Ano ang mahimo ko agud madugangan ang pagtuo sinang akon mga ginabantayan?

Para sa dugang nga impormasyon,
mag-log on sa reliefsociety.lds.org.